

U ovom broju, između ostalog, čitajte:

- **UPFBiH traži od Vijeća ministara BiH hitno donošenje odluke o zabrani izvoza trupaca i uvođenja taksi na izvoz drvnih sortimenata**
- **BiH privremeno zabranjuje izvoz oblovine, ogrjevnog drveta i peleta**
- **Poslodavci traže što hitnije usklađivanje Odluke o provođenju Zakona carinske politike sa Zakonom o carinskoj politici BiH**
- **Nije usvojen Dnevni red sjednice ESV -a**
- **Održana sjednica Grupacije poslodavaca ZDK pri UPFBiH**
- **Dom naroda BiH usvojio izmjene stope: PDV na životne namirnice pet posto, na luksuz 22 posto**



UPFBiH traži od Vijeća ministara BiH hitno donošenje odluke o zabrani izvoza trupaca i uvođenja taksi na izvoz drvnih sortimenata

Drvoprerađivači u BiH se već godinama susreću sa problemom nedostatka sirovine

Udruženje poslodavaca Federacije Bosne i Hercegovine pozdravlja inicijativu Vlade Federacije BiH upućenu Vijeću ministara BiH za donošenje Odluke o privremenoj zabrani izvoza iz Bosne i Hercegovine ogrjevnog drveta i peleta do 31.12.2022. godine. Udruženje poslodavaca poziva Vijeće ministara BiH da što prije usvoji ovu odluku i na taj način stvori uslove za pravovremeno snabdijevanje bh. građana ovim energentima.

Udruženje poslodavaca FBiH ujedno poziva Vijeće ministara BiH da donese Odluku o privremenoj zabrani izvoza trupaca i uvođenje privremenih izvoznih taksi na određene drvene sortimente, nižeg stepena obrade.



Iz Udruženja poslodavaca Federacije Bosne i Hercegovine je ranije dostavljen Vijeću ministara Bosne i Hercegovine prijedlog odluke kojom se pravnim i fizičkim licima zabranjuje da vrše promet trupaca izvan područja Bosne i Hercegovine te uvodi taksa na izvoz trupaca i drugih drvnih sortimenata nižeg stepena obrade. Odluka bi bila privremena i važila bi za period od 24 mjeseca.

Također, podsjećamo da se drvoprerađivači u Bosni i Hercegovini već godinama susreću sa problemom nedostatka sirovine, jer veliki postotak izvoza otpada upravo na sirovinu i rezanu građu. Ogromne količine, a posebno lišćara, se sijeku nelegalno i izvoze u nižim fazama

prerade iz BiH. Iako je više od pola teritorije BiH prekriveno šumama, drvoprerađivači su zbog loših zakonskih rješenja i nepravedne raspodjele na području naše države, prinuđeni da uvoze sirovinu. Zbog toga je neophodno uvesti mjere kojima će se zabraniti izvoz trupaca i uvesti takse na izvoz određenih drvnih sortimenata, čime će se podmiriti potrebe drvoprerađivača u BiH.



Podsjećamo da drvoprerađivačka industrija u BiH bilježi konstantan rast i suficit u vanjskotrgovinskoj razmjeni, a donošenje odluke o zabrani izvoza trupaca u uvođenje izvozne carine na drvene sortimente sa nižim stepenom obrade dalo bi još jači zamah razvoju ove industrije. Naglašavamo da podmirivanje potreba drvoprerađivača u BiH za sirovinom, posebno onih koji imaju veći stepen finalne obrade drveta, povećat će se broj zaposlenih u drvoprerađivačkoj industriji.

Uporednopravna analiza propisa zemalja okruženja i zemlja Europske unije pokazuje da je većina zemalja uvela takse na izvoz drvnih sortimenata ili skroz zabranila njihov izvoz.

Tako naprimjer, Austrija, Hrvatska, Crna Gora, Kosovo već dugi niz godina imaju takse na izvoz određenih drvnih sortimenata.

Predsjednik UPFBiH sa ministrom vanjske trgovine i ekonomskih odnosa BiH o zabrani izvoza oblovine, drveta i peleta

**Ministarstvo vanjske trgovine i ekonomskih odnosa BiH će pripremiti
prijedlog odluke kojom se privremeno zabranjuje izvoz**



Ministar vanjske trgovine i ekonomskih odnosa BiH Staša Košarac razgovarao je 07.06.2022. godine sa federalnim ministrom poljoprivrede, vodoprivrede i šumarstva Šemsudinom Dedićem, predsjednikom Udruženja poslodavaca FBiH Adnanom Smailbegovićem i predstavnicima Privredne komore o potrebi usvajanja odluke o privremenoj zabrani izvoza oblovine, ogrjevnog drveta i peleta. Sagovornici su usaglasili da je prioritetno u što skorijem vremenskom roku onemogućiti izvoz oblovine, ogrjevnog drveta i peleta bez uslovljavanja ranije potpisanim ugovorima.

- Stavovi nadležnih institucija Federacije BiH i RS-a o neophodnosti usvajanja ove odluke su usaglašeni i identični, što je ohrabrujuća vijest za domaće proizvođače i drvoprerađivače - istakao je Košarac.

Najavio je da će, nakon obavljenih konsultacija sa predstavnicima resornih entitetskih ministarstava, ovo ministarstvo do kraja tekuće sedmice pripremiti prijedlog odluke kojom se privremeno zabranjuje izvoz oblovine, ogrjevnog drveta i peleta iz BiH, a kako bi se u konačnici odluka mogla naći na Vijeću ministara BiH do kraja ovog mjeseca.

BiH privremeno zabranjuje izvoz oblovine, ogrjevnog drveta i peleta

Mjera će biti na snazi do kraja septembra



Vijeće ministara BiH je na 67. vanrednoj telefonskoj sjednici donijelo odluku o zabrani izvoza oblovine, ogrjevnog drveta i peleta iz države. Ova mjera je ograničenog karaktera. Bit će na snazi do kraja septembra, tačnije mjera se odnosi na period od 90 dana.

Prijedlog ove odluke početkom juna uputio je ministar vanjske trgovine i ekonomskih odnosa BiH Staša Košarac, a sve nakon razgovora s federalnim ministrom poljoprivrede Šemsudinom Dedićem i predstavnicima Privredne komore i Udruženja poslodavaca. Cilj ove odluke je osiguranje neophodnih količina za prerađivačku industriju, otklanjanje prijetnje od ozbiljne ili nepopravljive štete za šume u Bosni i Hercegovini i sprečavanje kritične nestašice ovih proizvoda za stanovništvo i privredu prouzrokovane krizom na svjetskom tržištu energenata.

Odluka će biti objavljena u Službenom glasniku BiH. Po isteku roka primjene, Vijeće ministara BiH ima mogućnost produžavati zaštitne mjere predviđene ovom odlukom, na prijedlog i na osnovu izvještaja Ministarstva vanjske trgovine i ekonomskih odnosa BiH o učincima primjene, a sve do ispunjenja ciljeva uvođenja privremene zabrane izvoza.

Vijeće ministara BiH može preispitati primjenu ove odluke i prije isteka njenog važenja u slučanju ispunjenja ciljeva njenog donošenja, na osnovu dostavljenog izvještaja Ministarstva vanjske trgovine i ekonomskih odnosa BiH.

Poslodavci traže što hitnije usklađivanje Odluke o provođenju Zakona carinske politike sa Zakonom o carinskoj politici BiH

**Poslodavci smatraju da je u potpunosti neopravdano onemogućavanje
izvoznicima da izvoze proizvode u dosadašnjem obliku**



S ciljem rješavanja problema ukidanja pojednostavljenog carinskog postupka po fakturi, Udruženje poslodavaca FBiH i predstavnici izvozno-orijentisanih kompanija održali su sastanak sa ministrom razvoja, poduzetništva i obrta FBiH Amirom Zukićem.

Poslodavci su istakli da Zakon o carinskoj politici u BiH, koji bi se trebao početi primjenjivati 01. augusta 2022. godine, propisuje pojednostavljene carinske postupke na isti način kao i trenutno važeći Zakon o carinskoj politici u BiH koji propisuje da neki od trgovinskih ili službenih dokumenata, u koje spada i faktura, mogu zamijeniti carinsku deklaraciju. Međutim, u Odluci o provođenju Zakona o carinskoj politici u BiH, koje je donijelo Vijeće ministara BiH, mijenja se navedena zakonska odredba i, u suprotnosti sa Zakonom, propisuje da se ne može koristiti trgovinski ili službeni dokument kao pojednostavljena carinska deklaracija.

Imajući u vidu trenutne okolnosti poslovanja u BiH i stepen ekonomskog razvoja naše države, poslodavci smatraju da je u potpunosti neopravdano onemogućavanje izvoznicima da izvoze proizvode u dosadašnjem obliku samo zbog donošenja pomenute odluke ta da ista ne smije derogirati Zakon.

Istakli su da će provođenjem Odluke izvoz pasti za 25-40 posto, odnosno da će bh. privreda izgubiti stotine miliona eura, te da će doći do smanjenja proizvodnje i poslovne aktivnosti, zaposlenosti, uplate direktnih i indirektnih poreza, a



povećavat će se troškovi prevoza proizvoda zbog dužeg perioda čekanja i otežanog carinjenja i ugroziti ugovori sa ino-partnerima.



Ministar Zukić je kazao da će Ministarstvo razvoja, poduzetništva i obrta FBiH uputiti inicijativu Ministarstvu vanjske trgovine i ekonomskih odnosa BiH i Ministarstvu finansija i trezora BiH da u skladu sa svojim nadležnostima učine napore i pripreme Vijeću

ministara BiH prijedlog Izmjene i dopune Odluke o provođenju Zakona o carinskoj politici BiH kojim bi se otklonili konstatovani problemi, odnosno da se Odluka uskladi sa novim Zakonom o carinskoj politici BiH kojim je dozvoljen pojednostavljeni carinski postupak po fakturi.

Udruženje poslodavaca FBiH će, zajedno sa Unijom udruženja poslodavaca RS, zatražiti sastanak sa ministrom vanjske trgovine i ekonomskih odnosa BiH kako bi ga detaljnije upoznali sa ovom problematikom s ciljem što hitnijeg rješavanja navedenog problema, zaključeno je na sastanku.

Sastanku su prisustvovali predstavnici kompanija ArcelorMittal d.o.o. Zenica, Sicecam Soda Lukavac d.o.o., Solana d.d. Tuzla, Širbegović Inženjering d.o.o. Gračanica, IGM d.o.o. Visoko te Tvornice cementa Kakanj d.d. Kakanj.

Dom naroda BiH usvojio izmjene stope: PDV na životne namirnice pet posto, na luksuz 22 posto



Delegati Doma naroda Parlamentarne skupštine Bosne i Hercegovine usvojili su na sjednici održanoj 15.06.2022. godine dopune Zakona o porezu na dodanu vrijednost (PDV) kojim se na pet posto smanjuje stopa PDV-a na osnovne životne namirnice, a na 22 posto se povećava stopa na luksuznu robu.

Ovaj zakon je ranije razmatrao i usvojio i Zastupnički dom BiH, ali u drugačijem tekstu, tako da će ići u proceduru usaglašavanja teksta.

Usvojeni Prijedlog zakona o dopunama Zakona o PDV-u podrazumijeva da se po sniženoj stopi PDV-a od pet posto oporezuje promet dobara i usluga i uvoz dobara, i to lijekova, brašno, hljeb dobijen od svih vrsta brašna, mlijeko i mliječni proizvodi, jestiva ulja, jestive masnoće životinjskog i biljnog porijekla, so, šećer i homogenizovana dječja hrana.

Istom izmjenom podrazumijeva se i to da se povećanim PDV-om od 22 posto oporezuju visokokvalitetna vina i alkoholna pića, visokokvalitetne cigare i cigarilosi, luksuzni parfemi, odjeća i obuća od krzna, nakit i srodni proizvodi, satovi vrhunski električni ili optički aparati, luksuzna vozila, umjetnička djela, oružje.

Nije usvojen Dnevni red sjednice ESV-a

Ekonomsko-socijalno vijeće Federacije Bosne i Hercegovine na tematskoj sjednici održanoj 21.06.2022. godine nije raspravljalo o Zakonu o najmanjem primanju u FBiH zbog neusvajanja Dnevnog reda protiv kojeg je bila delegacija Sindikata.



Ovaj zakon bio je jedina tačka Dnevnog reda.

Nastavak sjednice bit će poznat nakon održavanja Kolegija Ekonomsko-socijalnog vijeća za teritoriju FBiH.

Direktor UPFBiH učestvovao u diskusiji o učinkovitosti politika i mjera koje bi trebale da poboljšaju učešće na tržištu rada u BiH



Bosna i Hercegovina je potpisnica osamdeset i jedne konvencije Međunarodne organizacije za rad. Nacionalni izvještaj o humanom razvoju: Socijalna uključenost u Bosni i Hercegovini (NHDR) utvrđuje da se, uprkos postojanju relevantnog zakonodavnog okvira, kao i brojnim međunarodnim konvencijama i obavezama, u ovoj oblasti pojavljuju značajni izazovi. Podaci pokazuju da se Bosna i


Hercegovina suočava sa strukturnom i dugotrajnom nezaposlenošću, velikom neusklađenošću

ponude i potražnje za specifičnim vještinama koje traži tržište rada, kao i nedostatkom kvalifikovane radne snage.

Javna potrošnja na aktivne politike tržišta rada je ispod polovine prosjeka EU. Višegodišnje aktivne politike tržišta rada koje provode javne službe za zapošljavanje nisu značajno doprinijele stvaranju novih kvalitetnih radnih mjesta ili poboljšanju zapošljivosti radne snage u Bosni i Hercegovini. Iz ovih razloga, zemlja se suočava sa jednom od najnižih stopa zaposlenosti u regionu.

U svjetlu ovih izazova održana je diskusija o učinkovitosti politika i mjera koje bi trebale da poboljšaju učešće na tržištu rada u Bosni i Hercegovini.

U diskusiji je učestvovao i direktor UPFBiH Mladen Pandurević koji je istakao da jedini način da se situacija poboljša je ekonomski rast.



"Na povećanje plaća mogu uticati investicije, ali u tehnološki razvijenije oblike proizvodnje" kazao je Pandurević i dodao da preveliko porezno opterećenje rada utiče na povećanje plaća.

Događaj je organizovao Razvojni program Ujedinjenih nacija u saradnji sa ILO-om u Bosni i Hercegovini, a učesnici su bili donosioci odluka, praktičari, udruženja poslodavaca, sindikati i međunarodne organizacije u Bosni i Hercegovini.

Konferencija Biznis Agenda 2022: Prioritetne preporuke za rješavanje ključnih problema privatnog sektora



Povećati direktnu pomoć različitim kategorijama privrede i građana kroz transfere iz viška prikupljenih poreza, u svrhu ublažavanja inflatornih efekata; privremeno obustaviti naplatu akciza na gorivo, ubrzati procedure za otvaranje, vođenje i zatvaranje preduzeća, definisati mjere populacione politike, kako bi se zaustavio masovni odliv radne snage - neki su od zaključaka sa Konferencije "Biznis Agenda 2022: Prioritetne preporuke za rješavanje ključnih problema privatnog sektora", održane u organizaciji Centara civilnih inicijativa na kojoj su učestvovali i predstavnici Udruženja poslodavaca FBiH.

Kroz navedeni projekat kreirana je analiza o mehanizmima za kontrolu direktnih stranih ulaganja te je oformljena radna grupa koju su činili predstavnici biznis sektora, a koji su definisali ključne, prioritetne prijedloge za rješavanje problema sa kojima se suočava privredni sektor u Bosni i Hercegovini.

Na panelu "Kako do boljeg poslovnog okruženja u Bosni i Hercegovini", govorili su Muhamed Pilav, predstavnik Udruženja poslodavaca FBiH i Samir Avdibegović, predstavnik Britansko-bosanskohercegovačke privredne komore.

"Poslodavci su jedino svjetlo na kraju tunela u kojem se nalazimo i potrebne su nam radikalne ekonomske reforme, ne možemo više funkcionisati u ovom sistemu", kazao je Pilav.

Podsjeća da UPFBiH pokušava uticati na izmjene postojećih propisa i donošenje novih, za šta koristi sve tehnike od struke i iskustva poslodavaca. Predložili su i niz reformskih zakona, koji nažalost nisu implementirani jer se vlast bavi nebitnim stvarima.

"Vlast se bavi nebitnim i sporednim stvarima, a mi smo slutili da ćemo doći ovdje gdje se sada nalazimo i upozoravali smo na to. Došli smo do situacije gdje nam najbolji, nevrijedni i najpametniji ljudi odlaze. Hitno se mora raditi na radikalnom rasterećenju troškova rada jer se država trenutno finansira na osnovu parafiskalnih nameta kojih ima nekoliko hiljada u BiH i poreza na dohodak, dobit i potrošnju", poručuje.

Kada je riječ o tržištu rada, potrebno je napraviti radikalnu reformu obrazovanja koja će znatno unaprijediti kvalitet obrazovanja od samog vrtića pa do fakulteta jer imamo nefunkcionalna znanja.

"Sa niskim nivoom znanja, nemoguće je razvijati ekonomiju. Treba investirati ogroman novac u unapređenje obrazovanja kako bi se proizvodili radnici za tržište rada, a ne za evidenciju rada, odnosno odlazak iz BiH", ističe Pilav.

Samir Avdibegović smatra da su ključni problemi privrede mnogostruki, ali da se rješenja moraju tražiti.

"Smatram da se nalazimo u teškim vremenima, ali da postoje prilike koje trebamo iskoristiti u našu korist. Ono što mi iz Britanske privredne komore želimo uraditi jeste da pomognemo bh. privrednicima da dođu do Velike Britanije i da tamo ponude svoje proizvode i usluge, mi u tome vidimo veliku priliku. Također je važno da strani investitori i firme dođu u BiH i da zajedno radimo na rješenjima", kazao je Avdibegović.

S druge, Safudin Čengić, direktor Centrotransa i predsjednik Udruženja poslodavaca KS, smatra da to nije problem koji se rješava preko noći. To je proces koji će trajati godinama i što se prije počne tražiti rješenje za kvalitetno obrazovanje, prije će se doći do cilja.

"U ovom momentu, nama su potrebne hitne mjere vlasti, a to je oslobađanje, odnosno smanjenje poreza i doprinosa i usmjeriti sredstva u plaće uposlenika. Na taj način možemo reagovati i zadržati radnike na prostoru BiH", poručio je Čengić. Bitnim ukazuje problem što vlast ne reaguje na situaciju koja se dešava u posljednja tri mjeseca, te da niti jednom nije razmatrala negativne efekte rata u Ukrajini.

Faruk Hadžić, ekonomski analitičar i profesor na SSST, ponovio je ono na šta ukazuje već duže vrijeme.

"Svi indikatori pokazuju da će doći do još jedne recesije i važno je osnažiti privredu da bude što snažnija. Teško je očekivati da će privreda pomoći sama sebi kao što je to bio slučaj kada se desila pandemija", kazao je.

Zato je bitno, dodaje, da se provede reforma poreskog sistema, jer ukoliko se država ne želi odreći svog prihoda, onda ne treba ni ekstra zarađivati na ovoj krizi. Neka naplaćuje isto kao prije inflacije, ali je bitno zaustaviti ovaj zaustaviti spiralni rast cijena, na koji struka odavno upozorava. Na taj način će država olakšati povećanje plata radnicima, umjesto što bi poslodavci morali dizati cijene svojih proizvoda. Naglasio je i da nova kriza koja dođe, neće biti duboka i snažna kao pandemijska, ali će biti dugotrajna.

"Zbog toga je bitno povećati proizvodne aktivnosti i produktivnost, jer se na taj način dugoročno mogu kontrolisati neki sektori koji su bitni za dalji rast Bosne i Hercegovine", poručio je Hadžić.

U nastavku konferencije govorilo se o tržištu rada u BiH. Azra Atagić-Ćatović, direktorica portala Akta.ba je rekla da je nedostatak radne snage u BiH evidentan već godinama, posebno u građevinarstvu, turizmu, ugostiteljskom sektoru. Uvoz stranih radnika jedan je od načina rješenja problema, pa su tako na građevinskim radovima angažovani radnici iz Turske i drugih zemalja. Na drugoj strani, na birou je više od 35 posto naših građana koji nemaju nikakve kvalifikacije i koje je potrebno prekvalifikovati i pružiti im šansu da rade i ostanu u BiH.

"Prijedlog je da ipak prekvalifikujemo naše radnike koji se nalaze na birou. Država sa jedne strane, da oslobađanjem od doprinosa ili nekih drugih taksi i naknada, pomogne poslodavcima koji žele da rade prekvalifikaciju u svojim kompanijama, ali i da država oformi mehanizme da može vršiti prekvalifikaciju za potrebe poslodavaca", izjavila je Azra Atagić – Ćatović.

Zaključak je da odgovor nadležnih institucija na novu ekonomsku krizu i značajnu inflaciju mora da postoji i da sadrži konkretne ciljeve i aktivnosti za ublažavanje negativnih efekata. Neophodno je da one budu zasnovane na sveobuhvatnim informacijama. U slučaju privatnog sektora, najbolji izvor informacija je glas privrednika koji se direktno suočavaju i prepoznaju probleme koje zahtijevaju hitne reakcije, te nude i konkretna rješenja za prevazilaženje aktuelne situacije.

Direktor UPFBiH prisustvovao proslavi Dana nezavisnosti SAD-a



Na poziv ambasadora SAD-a u BiH Michaela Murphyja, direktor Udruženja poslodavaca Federacije Bosne i Hercegovine Mladen Pandurević prisustvovao je 30. juna 2022. godine tradicionalnoj proslavi Dana nezavisnosti Sjedinjenih Američkih Država.

Dan nezavisnosti Sjedinjenih Američkih Država se, inače, obilježava 4. jula, a ove godine će Sjedinjene Američke Države proslaviti svoj 246. rođendan.

Obraćajući se prisutnima ambasador SAD-a u našoj zemlji Michael Murphy je posebno naglasio da se za demokratiju i slobodu neprestano mora boriti i da

izgradnja demokratije, zapravo nikada ne prestaje.

Naglasio je da je proces izgradnje demokratije stalan, da je to proces koji traje, proces usavršavanja i odgovornost koja se prenosi s jedne generacije na drugu.

-Siguran sam da svi prisutni ovdje večeras žele nešto bolje za BiH, inkluzivne zajednice, funkcionalne vlasti, okončanje blokada i nacionalističke retorike, bolje obrazovanje za djecu, radna mjesta zbog kojih će poželjeti da ostanu u ovoj zemlji i grade svoju budućnost ovdje - naveo je Murphy.

Održana sjednica Grupacije poslodavaca ZDK pri UPFBiH



Na sjednici Grupacije poslodavaca ZDK pri UPFBiH, održanoj 15. juna 2022. godine, članovi su predložili kandidate za organe Grupacije i UPFBiH.

Za predsjednika Skupštine Grupacije ZDP pri UPFBiH predložen je Benjamin Babić, a za potpredsjednika Fahrudin Bobarić.

Za predsjednicu Upravnog odbora Grupacije poslodavaca ZDK pri UPFBiH predložena je prokurista društva "Trgošped" d.o.o Kakanj Alma Zaimović, a za potpredsjednike direktor firme "Minex trade" Ibrahim Meškić i direktor firme "Tisakomer" Nagib Mujkić.

Za članove Upravnog odbora Grupacije predloženi su: Vladimir Franjić, direktor firme "Meridijan" d.o.o Zenica; Nedžad Babić, advokat; Enes Karić, direktor firme "Braća Karić" d.o.o. Zenica; Mirza Zaimović, direktor firme "Nova trgovina-s" d.o.o. Kakanj; Kenan Handžić, direktor firme "Teve varnost elektronika" d.o.o. Visoko; Semir Kantić, direktor firme "Ssam plast" d.o.o. Tešanj; Šemsa Mujaković, direktorica firme "Sun pack" d.o.o. Tešanj; Edin Čaušević, direktor firme "Frigošped" Žepče; Rifet Bečić, direktor firme "Thermoplus" d.o.o. Zavidovići; Adnan Teletović, direktor "Rudnik" Vareš i Azra Hodžić u svojstvu predstavnika mesoprerađivačke djelatnosti.

Za novog člana ESV-a ZDK predložen je Dino Ahmić koju će ovu funkciju obavljati umjesto Kasima Kotorića.

Za članove UO i Skupštinu UPFBiH, ispred Grupacije poslodavaca ZDK pri UPFBiH, predloženi su:

- Edin Jabandžić, iz Tešnja, direktor firme "MADI" d.o.o Tešanj
- Senad Brka, iz Tešnja, director firme "ABIAS" d.o.o Tešanj
- Venan Hadžiselimović, iz Tešnja, izvršni direktor firme "HIFA-OIL" d.o.o. Tešanj
- Saća Prnjavorac, iz Tešnja, direktorica firme "DOBOJPUTEVI"d.d. Doboj-Jug
- Nagib Mujkić, iz Žepča, director firme "TIAKOMERC" d.o.o. Žepče
- Rifet Bečić, iz Zavidovića, direktor firme "THERMOPLUS" d.o.o. Zavidovići
- Amela Hadžić, iz Zavidovića, menadžer u firmi "TISAKOMERC" d.o.o Žepče
- Edin Badnjar iz Žepča, director firme "BADNJAR" d.o.o. Žepče
- Admir Čaluka iz Kaknja, director firme "SIM KOMERC" d.o.o. Kakanj
- Mirza Zaimović iz Kaknja, director firme "NOVA TRGOVINA-S" d.o.o. Kakanj
- Babić Benjamin, iz Zenice, director firme "BABIĆ BISS-TOURS" Zenica
- Enes Karić, iz Zenice, director firme "BRAĆA KARIĆ" d.o.o. Zenica
- Kenan Handžić, iz Visokog, director firme "TEVE VARNOST ELEKTRONIKA" d.o.o Visoko
- Jasmin Spahić, iz Visokog, director firme "BROVIS" d.d. Visoko
- Alma Beširević, iz Breze, u svojstvu predstavnika trgovinske djelatnosti
- Ana Alić, iz Breze, u svojstvu predstavnika računovodstvenih agencija
- Azra Hodžić, iz Breze, u svojstvu predstavnika mesoprerađivačke djelatnosti
- Sabina Nebić- Bitić, iz Breze, u svojstvu predstavnika uslužnih djelatnosti

Skupština Grupacije održat će se 30.06.2022. godine na kojoj će se imenovati kandidati za organe UPFBiH i Grupacije.

FMERI objavio Javni poziv za kandidovanje programa utroška sredstava Trajnog revolving fonda kod Union banke d.d. Sarajevo



Federalno ministarstvo energije, rudarstva i industrije objavilo je Javni poziv za kandidovanje programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2022. godinu.

Predmet poziva je prikupljanje zahtjeva za odabir korisnika kreditnih sredstava, u skladu sa Programom utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2022. godinu.

Pravo učešća na Javnom pozivu imaju privredna društva sa sjedištem u Federaciji

Bosne i Hercegovine čija je primarna djelatnost definisana djelatnostima proizvodnje u sljedećim sektorima industrijske proizvodnje:

- Metalna, elektro i automobilska industrija,
- Industrija građevinskog materijala i nemetala,
- Drvna, papirna i grafička industrija,
- Proizvodnja tekstila, odjeće, kože i obuće i
- Hemijska, farmaceutska industrija i industrija gume i plastike,
- te da zapošljavaju najmanje deset zaposlenika.

Pozajmljivanje sredstava prema Javnom pozivu može biti odobreno ako su ispunjeni sljedeći, osnovni, kriteriji:

- osnovana po Zakonu o privrednim društvima („Službene novine FBiH", broj 81/15)
- da su privredna društva sa sjedištem u Federaciji Bosne i Hercegovine čija je primarna djelatnost definisana djelatnostima proizvodnje u sektorima navedenim u tački 2. Javnog poziva,
- da zapošljavaju najmanje deset zaposlenika.

Ukupno planirana sredstva po ovom Programu iznose cca 9.660.000,00 KM.

Više o Javnom pozivu pročitajte [OVDJE](#).


Program i Zahtjev možete preuzeti na [stranici Ministarstva](#).

Poziv za prijave: FSC Furniture Awards 2022



U skladu s motom "Bolji život, zdravije šume", Forest Stewardship Council Adria - Blakan (FSC) pokreće novo izdanje svojeg natjecanja i traži održive proizvođače namještaja i trgovce diljem Europe.

FSC Furniture Awards je natjecanje koje je stvorilo Forest Stewardship Council™ kako bi se prepoznala predanost FSC-u i održivosti poduzeća u sektoru namještaja za unutarnje i vanjske prostore. Nagrade su otvorene za nositelje FSC certifikata i promotivne licence u sektoru



namještaja koji imaju sjedište u jednoj od sljedećih europskih zemalja: Austrija, Belgija, Bosna i Hercegovina, Hrvatska, Češka, Danska, Francuska, Njemačka, Italija, Crna Gora, Nizozemska, Sjeverna Makedonija, Poljska, Portugal, San Marino, Srbija, Slovenija, Španjolska, Švicarska i Ujedinjeno Kraljevstvo.

Poduzeća koja se prijave imat će priliku osvojiti jednu od tri kategorije nagrada: Predanost (Commitment), Brend (Brand) i Komunikacija (Communication) (jedna nagrada za proizvođače i jedna za trgovce u svakoj kategoriji).

FSC Commitment Awards dodijelit će se nositeljima certifikata/licenci koji se zalažu za FSC prednost u nabavi i komercijalnim politikama. FSC Brand Awards odaje priznanje poduzećima koje koriste FSC zaštićene oznake na izvanredan način. FSC Communications Awards nagradit će poduzeća koje se ističu u promotivnim aktivnostima i kampanjama s FSC-om.

Prijava na natjecanje FSC Furniture Awards može se podnijeti do 8. septembra, putem službene web-stranice fscfurnitureawards.org. Sudjelovanje je besplatno.

Za prijave i dodatne informacije posjetite službenu web-stranicu www.fscfurnitureawards.org.



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba